

四庫全書

集部

欽定四庫全書

集部

後村集卷十四至
十六

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣陳秉寧

欽定四庫全書

後村集卷十四

宋 劉克莊 撰

詩

雜詠一百首

長弘

宗周危可憫
長叔死非難
臣血三年碧
臣心一寸丹

柳下惠

不怨窮并佚
能安小與卑
何須立奇節
展季即吾師

樂毅

忿懟及韓馮荒唐入郢鞭樂生端可拜寧死不謀燕

屈原

辛姓且為擄纍臣安所逃不能抱祭器聊復著離騷

賈誼

寄聲謝絳灌勿毀洛陽人歲晚治安策諄諄禮大臣

虞翻

孝廉已稱帝賓佐盡封侯不道投荒客交州白了頭

顏魯公

鬼質內持衡強藩外握兵一朝臨白刃乞米老儒生

李白

幸自忤將軍那堪觸太真世無郭中令誰贖謫仙人

陸贄

飲食晚由竇門庭誰敢窺禁中無急詔不記奉天時

劉蕡

貂璫竊大柄韋布獻孤忠榜出惟風漢無名在選中

右十臣

尹伯奇

不愁兒足凍第恐母心傷所以子范子惟彈一履霜

宜白

莫親於父子天性有時移竟以婦為厲空令傳作詩

申生

君父如天地雖逃安所之可憐共世子死不恨驪姬

曾子

親勛何以報子職貴乎勤梨本非難熟瓜殊未易耘

伍尚

伍奢呼二子一至一奔焉逃父吾無取讐君亦未然

扶蘇

詔自沙丘至如何便釋兵君王令賜死公子不求生

東海王疆

聖經非拒父古誼有傳賢據以兵求勝疆能智自全

姜詩

晨興風色惡日晏汲歸遲寧與閨中訣莫令堂上饑

王祥

禮律通稱母寧分繼與親乃知履霜子絕似卧冰人

寧王

智出建成上賢於子糾多至今稱讓帝當日喚寧哥

右十子

伯夷

木主來西土檀車濟孟津只應千萬世瞻仰首陽人

嬰白

賢矣兩家臣存孤極苦辛後來有曹馬亦是受遺人

王蠋

稷下空多士誰為國重輕列城七十二死者一書生

魯仲連

六國鈞南面甘為北面臣向微生一叱幾帝虎狼秦

豫子

紛紛荆聶輩猶有利而為智氏已無後先生欲報誰

龔勝

已設牀臨牖何須綬著身遂令移鼎賊知愧飾中人

陶淵明

卜築堪容膝休官免折腰寧書處士卒不踐寄奴朝

甄濟

唐德雖中否猶能愧畔臣盡驅汙賊者往拜詐暗人

何蕃

城去曾聯疏宣收亦舉幡向令無太學安得有何蕃

司空圖

節將飛颺去牙郎賣弄餘唐臣不負國惟有一尚書

右十節

許由

一聞堯禪後洗耳急歸休鄰叟嫌泉濁牽牛飲下流

沮溺

皇皇問津者藐藐耦耕人不識吾夫子寧非古逸民

荷蓀丈人

客云自孔氏不覺喜逢迎止宿見二子孰云無世情

接輿

上古聞巢父衰周有楚狂由來豪傑士不必待文王

四皓

去避坑焚禍來成羽翼功留侯不自語驅使紫芝翁

兩生

尚恐公汙我何妨史失名深衣與短製同名不同行

嚴光

幸自沉冥去無端物色求蓑衣亦堪釣何必被羊裘

梁鴻

肅宗漢明主猶惡五噫詩一旦拂衣去世人那得知

龐公

採藥棲遲穩燃萁篡奪危景升不愛子却念德公兒

汾亭釣者

太公輔西伯嚴子客東京獨有汾亭者無人得姓名

右十隱

荀卿

歷歷非諸子駸駸及聖儔乃知焚籍相亦自有源流

穆生

決去先生勇懷安二子慚向令猶在坐楚市赭衣三

伏生

偶脫驪山厄龍鍾九十餘誰知漢掌故傳得不全書

轅固

面折公孫子堂堂負直聲安知上前論那復有黃生

申公

綰臧不自保強致老先生魯邸今朝罷蒲輪昨日迎

兒寬

茂陵輕樸學寬對乃忻然口謾談三代書纔說一篇

劉向

竊弓俱奮臂窺鼎迭磨牙同姓餘中壘昌言抑外家

周堪

舊憊臣學淺晚召主恩深莫鑒蕭張否重來遂病瘖

鄭司農

新箋傳後學古訓發先儒不擬狂年少燈前罵老奴

王通

當時三晉地已有聖人生不曉河汾氏為隋策太平

右十儒

孟之反

棄甲爭先去收兵殿後回但云馬不進應自聖門來

曹沫

數戰數敗北寧非將畧疎收功一匕首安用讀兵書

庶頗

浪說三遺矢猶堪一據鞍君王不自試耳目信人難

李牧

說客為秦謀君王信郭開向令名將在兵得到叢臺

白起

太息臣無罪胡為伏劒鉞悲哉四十萬寧不訴蒼蒼

蒙恬

絕漠功雖大長城怨亦深但知傷地脉不悟失人心

魏尚

塞外傳烽急雲中調守難誰為帝言者白髮老郎官

李廣

飛將無時命庸奴有戰勲誰憐老衛尉身屬大將軍

馬援

土室不堪處其如瘴毒何莫年款段馬有愧少游多

劉琨

除却祖生外餘皆在下風老奴口耳小安得肖司空

右十勇

廣成子

不能戰涿鹿聊復隱崆峒揮手謝軒帝毋煩順下風

彭祖

活得如彭老憂愁八百春頻為哭殤叟屢作悼亡人

老子

了不見矜色睟然貞德容先生新沐髮弟子嘆猶龍

列子

肉身無羽翼那有許神通會得冷然意人人可御風

徐甲

白骨因誰活青牛與爾俱未酬再生德更索積年逋

王子晉

宿有驂鸞約飄然溯碧霄不為君主宅却伴女吹簫

安期生

子羽徒扛鼎其如欠轉圜不能決王霸聊去作神仙

劉安

忽棄國中去疑為方外遊
早知守都廁何似莫仙休

梅福

忽去為吳卒深逃安漢公
翻身天地外脫屣市朝中

孫思邈

藥品用昆蟲遂虧全活功
至今仙未得只在蜀山中

右十仙

瞿曇

世傳漢明帝始夢見金身曷不觀列子西方有聖人

維摩

面色削爪黃眉毫覆雪長安知四天下只在一禪牀

善財

放勲訪吾叔魯叟問弘明所以此童子諸方亦遍參

達摩

直以心為佛西來說最高始知周孔外別自有英豪

盧能

明鏡偷神秀菩提犯卧輪更將舊衣鉢占斷不傳人

馬祖

若非大氣魄只是小機鋒老子一聲喝學人三日聾

德山

此老手中棒輕輕也有瘢佛來與三十某甲莫須餐

支遁

若以色見我幾於貌失人林公少鬚髮澄觀欠冠巾

澄公

值亂行何適隨緣住亦安能將石虎輩只作海鷗看

誌公

寺甲於江左身迎入禁中如何淨居殿餓殺老蕭公

右十釋

衛姜

俱著錦衣裳憑誰辨綠黃可憐君老矣賢嬖不賢姜

阿嬌

甫聞阿嬌進又報衛娘留莫倚金為屋重重只鎖愁

烏孫公主

玉座吞聲別，毬車觸目悲。
如何漢公主，出塞作閼氏。

平后

歆已作佐命，雄甘為大夫。
獨餘黃室主，不肯面新都。

辟司徒妻

倉皇問君父，忠孝兩闕心。
絕勝杞梁婦，惟知哭藁砧。

冀缺妻

昔有二人貧，耕田與負薪。
朱妻志求去，郤婦敬如賓。

黔婁妻

夫節獨高古婦賢傳至今既為加美謚復不用邪衾

齊人妻

不敢怨夫子徒悲誤妾身安知同穴者乃是乞墻人

儒仲妻

彼雛飾容服吾穉業耕鋤不以貧慚富賢哉婦傲夫

廬江小吏妻

尊璋有嚴命妾不獲從夫去去猶回首諄諄別小姑

右十婦

召南媵

貴賤有定分勤勞無怨心若令逢呂武亦化作姜任

李夫人

恍惚疑如在纏綿愛未休明知已仙去猶欲出神求

馮昭儀

獸不能加害傾身障赭紅安知丁與傅他日鷲於熊

班婕妤

妾命薄如紙君恩冷似冰生當事長信死願奉延陵

蘇秦鄰妾

主命亦危矣媼謀真拙哉煩君賜妾杖嗔妾覆君杯

樊通德

妝束姑隨世風流亦動人等閒擁髻語千載尚如新

銅雀妓

誰謂曹瞞智回頭玉座空向來臺上妓盡入洛陽宮

房老

殘香猶在筭舊曲尚書帟不及新歌舞樽前奉主君

綠珠

向來金谷友至此散如雲却是娉婷者樓前不負君

柳家婢

忽見牙郎態吁嗟悔失身不虞小婢子曾是柳家人

右十妾

後村集卷十四

欽定四庫全書

後村集卷十五

宋 劉克莊 撰

詩

雜詠一百首

毛遂

兩國爭衡際諸君袖手觀羣然著珠履誰肯捧銅盤

荆軻

把袖謀幾售開圖計忽窮空遺千古恨不中祖龍胃

項羽

頓無英霸氣尚有婦兒仁聞漢購吾首持將贈故人

陳勝

辛苦傭耕久饑寒謫戍餘竟令秦失鹿首為漢毆魚

博浪壯士

殿上俄流血沙中竟脫身乃知燕刺客有愧漢謀臣

朱家

貴不見渠面危曾活爾身奈何施一飯便責翳桑人

田橫

南面稱孤貴西京謁帝卑誰能如李密更望一台司

劇孟

向令從七國是自列陪臣太尉空稱賞非知劇孟人

孫策

魚服俄離網龍泉忽缺鉞却將江左業分付紫髯郎

周戴

戴昔刼名士周嘗暴里人少年一蕩子歲晚兩忠臣

右十豪

鬼谷子

遺書今羽化傳者匪真書此老縱橫祖儀秦得緒餘

二衍

雖以賓師待幾於妾婦然不羞君割地謾對客談天

韓非

韓子流於慘聃書妙入微百年同一傳誰是復誰非

莊子

夸大帝傳由形容跼侮耶僅饒眊禦寇共載一虛舟

侯羸

白髮夷門老能興晉鄙師魏王備它盜曾不備如姬

范雎

不待精神契惟憑頰舌求莫年薦燕客差勝似穰侯

蘇秦

常產常心論平生不謂然晚知蘇季子佩印為無田

田光

北面老先生人間事飽更不聞求樂氏但見薦荆卿

茅焦

焦子如天胆秦王似虎嗔如何刀几上活得解衣人

蒯通

酈生方橫死蒯徹亦陽狂設不逢劉季同趨一鼎湯

右十辨

墨翟

墨子城無恙公輸械有窮要須能壁立未可恃梯攻

樗里子

石馬殘陵下金鳧出藏中誰云樗里智卜墓近秦宮

陳平

巧言愚冒頓厚賂餌閼氏祕計言之醜剛云世莫知

鼂錯

危晁知不免削楚慮空長東市哀朝服西京號智囊

楊修

老賊有肝鬲多為德祖窺誰令預籌事更與共觀碑

倉舒

全活啗鞍吏平章秤象船不乎真有幸舒也竟無年

荀彧

殺身明逆順濡足救危亡未必荀文若甘為操子房

漢昭烈帝

華容蘆荻裏一炬可無遺嘆息劉玄德平生見事遲

杜預

征南滿腹智實似小兒痴漢水有涸日沉碑無出時

李衛公

肘後臣非靳胷中彼未純乃知兵妙處不可妄傳人

右十智

韓起

帶從內府頒枕出古陵間却咲韓宣子區區愛一環

富平侯

童作夫人紡藏錢百萬多不知三篋內還記舊書麼

董卓

虎視無強對
鴟張有篡心
可憐臍裏燭
不照塢中金

王戎

惜李常鑽核
商財自執籌
如何嵇阮輩
放入竹林遊

石崇

金谷觴豪友
珠樓擁艷姬
南交來處悖
東市悔何追

祖珽

左氏譏懷璧
楊公却袖金
安知機巧者
藏得巨羅深

張說

王檢匪頌隆珠簾餽遺通更揮謏墓筆褒讚死姚崇

元載

三千兩鍾乳八百斛胡椒不悟口中韞猶貪掌上腰

杜兼

沒有財遺臭生無善可傳向來堆白屋盡是窟郎錢

桑維翰

五季驕諸鎮終朝易十人使無孔方癖猶是漢名臣

右十貪

尹氏

聚蹶并番橘今猶唾姓名國人深可畏尹氏更須平

太宰嚭

西子宴姑蘇靈胥賜屬鏤如何居上宰忠越不忠吳

呂不韋

豫建無長慮旁窺有貶心絕羸由呂相繼馬乃牛金

李斯

焚餘寧有籍坑後更無儒不解愚劉項翻令二世愚

公孫弘

極力排舒黯
聯翩去不迴
惟應刀筆吏
時得到翹材

孔光

佞幸傳呼至
師臣偃僂迎
莫年靈壽杖
幸自可扶行

李林甫

二相去留際
中原治亂分
異時馬上淚
遙洒曲江墳

盧杞

僭偽蟠宮闕
忠賢血賊庭
相君無喜愠
面色只藍青

崔昌遐

本欲除閹腐安知召寇戎緇郎不為相朱賊得稱雄

馮道

坐閱數朝主竟為何代人漢官敍歷遍獨自作師臣

右十儉

巷伯

哆侈何其甚憂傷只自知雖經夫子筆不廢寺人詩

梁丘據

國漸移田氏人誰悟景公牛山兩行淚據與寡人同

臧氏

嬖與賢分國賢踈嬖在旁未嘗無樂克其奈有臧倉

景監

但見顓朝久誰知媚竈勤紛紛由嬖進非特一商君

趙高

歸自沙丘後因專定策功國由中府令帝在望夷宮

曹騰

費亭侯在日亂已有萌芽養得螟蛉種猶能覆漢家

張讓

舉國排閹尹還鄉少弔賓太丘芻一束全活幾多人

高力士

五十年間事渾如曉夢餘三郎南內裏何況老家奴

仇士良

國老辭機密閹兒叩緒餘殷勤傳一訣莫遣上觀書

張承業

勅使為唐患忠唐獨有君晚知王自取悞殺老監軍

右十壁

神農

盡識參無毒明知堇有灾安知嘗試者百死百生來

素女

厥初賦形貌固已具陰陽素問無人讀流為采戰方

扁鵲

疾始於榮衛哀哉不豫謀貪生諱聞死天下幾桓侯

醫和

壽有可延理醫無不死方扁曾憂骨髓和亦畏膏肓

李醯

自昔名高世皆由藝入神未應除扁鵲世上便無人

夏無且

秦法嚴堂陞秦兵遶殿廬如何危急際只有一無且

華佗

古來神異少天下妄庸多文帝能全意曹瞞竟殺佗

壺公

跳入無人見誰知有路通長房非黠者草草出壺中

陶隱居

方差能腊腹學悞至漸襟幸有經文在休於注脚尋

韓伯休

女子乃知我明朝變姓名可憐逃不密猶迫詔書行

右十醫

巫咸

列書訖知死楚些說招魂尚莫窺壺子安能返屈原

史蘇

繇語幾於讖流傳信有諸王何謾辛苦易自是占書

詹尹

魚腹纍臣訣蛾眉衆女仇靈均空發問詹尹若為訓

季主

宋賈兩名士茫然立下風信知古賢聖多隱卜醫中

洛下閎

巧歷雖千歲先知一日差未能下筭子亦道是占家

嚴君平

賣卜本逃名下簾無市聲如何穹壤內知世有君平

京房

元帝何曾諭京生自此疎區區推卦氣欲撼石中書

管輅

平叔知幾語疑於易學通歲朝不相見隔日問三公

李淳風

逆知生女主預說覆唐宗誤殺五娘子安知在後宮

袁天綱

似有人推背相傳果是非請君看秘記若箇泄天機

右十卜

項橐

義理無窮盡宣尼或未知老聃與項橐聖豈有常師

甘羅

函谷非無士登庸乳臭兒空令園綺輩頭白不逢時

外黃兒

子羽力扛鼎諸侯屈膝臣能從小兒語盡活一城人

終童

武帝有荒志終童無遠謀長繩自繫耳莫繫越王頭

童烏

擊蒙鑿帝竅躡等草玄經混沌死七日童烏夭九齡

荀陳

或作操謀主羣為丕上公暮年翻有愧膝上與車中

孔融子

二穉吁何罪冤猶在史書老瞞渾忘却只記哭倉舒

通子

但愛梨并栗不傳琴與書乃翁莫惆悵它日舉籃輿

阿宜

牧有諄諄誨宜無赫赫聲假令如叔父一世得狂名

阿買

座上交游廣城南講讀餘如何萬金產只解八分書

右十稗

漆室女

舉國聽桓子呼天誅孔耶可憐倚楹女徒為魯君憂

東家女

神女登徒子微詞未必然感襄通一夢窺玉費三年

散花女

狡獪疑為幻姝妍復似魔殷勤把花去莫惱病維摩

緹縈

天子覽書悲肉刑無復施不惟嘉烈女亦自活神醫

曹娥

穹壤有時赦娥名萬古垂直從彤管筆便到色絲碑

阿承女

古人重言德初不論傾城切莫傷容髮猶堪嫁孔明

戴良女

竹筥并練帔何妨託妾身若逢夫婿問向道乃翁貧

木蘭

出塞男兒勇還鄉女子身尚能吞勁敵斷不慕西隣

投梭女

琴挑何曾動梭投未免慚女郎循古禮元不解清談

靈照

首如飛蓬亂家賣漉離供老漢驚吾女禪機捷乃翁

右十女

後村集卷十五

欽定四庫全書

後村集卷十六

宋 劉克莊 撰

詩

讀竹溪詩一首

不敢匆匆看晴窓幾絕編
參它少陵髓饒得奕秋先友
願低頭拜師曾枕膝傳已將
牌印子牒過竹溪邊

甲辰書事二首

捷書猶濕謗書隨太息
斯人得禍竒文舉舊曾稱一鶚

退之亦自喜孤羆彼讒罔極身羅織吾意憐才力髮絲
老去眼中神駿少諸君莫怪道林師

往昔曼卿曾奪敕後來同甫竟成名草茅匹士謀身拙
槐棘諸公議法平囚服若為探禹穴明時定不血秦坑
何當拜舞雞竿了沽酒剗羊與雁驚

再和

動而得謗亦名隨生子看來不必奇爾輩真堪界豺虎
君王安用獵熊羆人言李白文如錦誰信盧能命若絲

回首世間機
穽惡子歸
閉戶有餘師

鵲袍再著姑
行法雁塔
重來定策名
大尹前呵寬
賈島相君十
反訪州平故
溪舊有釣魚
石平地今多
陷馬坑不信
天公囚兩鳥
一鳴會遣百
蟲驚

三和

自古名高易
毀隨誰令倣
儻更權竒心
知吾友必中
鵲眼見乃翁
初夢羅所幸
解驂逢晏子
不須結客報
袁絲古人進
德多因此公
治臺卿是汝
師

同進多為蕢訟屈薄徒苦與賀爭名從教雪犬吠所怪
肯學秋蟲鳴不平沙虱伺人陰發矢蝦蟆欲客化為坑

玉川荅蝦蟆云我
身化作青泥坑

相逢莫說當時事說著當時尚失驚

四和

一橐蕭然五鬼隨竟緣名盛與文奇可曾天下無麟鳳
何必山中有虎羆蜂蠆尾猶如許毒蜘蛛腹得幾多絲
聖賢不校吾家法車及蒲騷豈足師

誰謂斯文無定價獨憐之子坐虛名主司頭與筆俱點

宰物心如秤樣平駿馬却還國西域病鴟墮落屋東坑
老夫謝絕人間事亦為諸賢喜且驚

五和

出門機穽已相隨竟放靈均逐伯奇始者齧膚微似蚋

俄然擇肉及於羆

韓詩擇肉於熊羆肯顧兔與狸

不言快箭穿楊葉却

訝長松託兔絲敗壞人材由利祿乃知曾點勝顓師

少日父兄誇俊聲後來場屋擅文名錦囊久矣憎長吉

玉枕幾於殺阿平

王敦殺平子先取其玉枕

怪底鷗羣及魚隊化為

虎落與蛇坑可憐彩翠矜毛羽顧影無言只自驚

六和

對策南宮恥詭隨聊攄腹憤發胃竒並驅何異牛同驥
獨步方知虎畏羆罰汝業儒磨鉄硯輸他擁妓寫烏絲
區區夢裡爭蕉鹿咲殺傍人與士師

范老登科猶別姓余公應舉亦更名人心何止矛般險
世道於今砥似平到了赭衣同適市知它白梏欲誰坑
鍾會作大坑白梏欲殺魏兵未發為魏兵所殺雲端別有冥冥翼不受虛弦浪

箭驚

七和

妙年文價重和隨不料東家產此奇
讒者紛紛傳有虎詞人往往讓於
羅探囊已足三年艾補袞那無五色
絲聞說卜鄰王翰了長卿安敢出偏
師

南京放榜已蜚英北闕傳臚却漏名
潛救八叉文最敏

溫飛卿事

盡歸一網氣難平白生作麼教持杵
越石爭些已

見坑

王愷欲坑劉琨兄弟

莫倚晴天頻吐綬兒童見了又須驚

八和

黠兒陰挾彈丸隨發巧懸知中必奇蠅本至微求附驥

羆猶可畏况生羆

李義山詩封狼生羆羆生羆

烘燂似虱羣藏絮纏

縛如蠶自吐絲玉汝於成賴渠輩何須挾策遠從師

早知抱璞煩三獻底用操觚角一名歸去驢堪駝子美
向來羊尚記初平里居僅有簞瓢巷壁立元無鼓鑄坑
說與添丁并德曜從今熟寢不須驚

九和

羣兒孰敢比肩隨翻水成文出愈奇人欲彎弓戕后羿
天寧飛箭中王羅愛材不忍淹叢棘去惡真如斬亂絲
珍重阿蒙宜努力此生不可負君師

貫索星明方用事金花帖至枉標名朝無左右容鄒子
家有嬋媛詈屈平忍使衣冠同坐錮未聞逢掖自相坑
還鄉何止交遊絕鷗鳥逢渠也自驚

十和

一夫倡禍翕然隨白晝通都作崇奇割肉直將人餒虎

聞聲能感類求羆忽傳先輩逢清雪失喜衰翁有黑絲
自古英材須樂育謂余不信質先師

盛德能容人有技忮心尤忌士知名訓狐聲厲憎韓子
鸚鵡才高累禍平班特隱君幾負局塞鴻奴輩不煩坑
客來林下溫前話尚得山翁掩耳驚

送實之倅廬陵二首

芻言當日偶然同白首家山各固窮海內僅存一畏友
人間遂有兩愚公似聞黃閣登迂叟且向青原訪醉翁

此士未應無著處栖栖十載六治中

君去江邊春色濃羣花照席萬枝紅
守分風月元非贅吏白文書但托聾
黃本何堪處秦觀白麻近已拜申公
早歸了却蘭臺吏莫久吟詩快閣中

送葉士龍歸竹枝精舍

侍講開甥館三間不至奢少曾居北面老
只住東家野笋庖尤美深衣袞未華
何時尋舊路去謁玉川茶

勉齋依丈

公以居雲叟勉齋高弟也

題李斗南詩卷

君家兩詩人詩名滿天地大者扶宿醒入論金鑾事小者乘天風去草玉樓記却後五百年之子豈苗裔奈何不神仙亦復未富貴抱瑟諸公門索米長安市

題安仁陳慧父詞卷

已著西山序集端欲添一字愧才慳平生行脚千詩裏歲晚營巢萬竹間後有揚雄寧不好世無孔子孰能刪歸舟他日溪邊過珍重先生莫掩關

夜讀樂平吳藥書鈔用與伯紀韻

病思羈懷少豫忻暮年猶幸友多聞
千枝管禿因稽古一啜芹甘欲獻君
明主何曾輕樸學後儒大率讀今文
藏山俟聖吾儕事何必時人好子雲

挽湯仲能二首

拔起真三秀分飛祇二難怕趨丞相熱
寧忍后山寒梅老徒書局徂徠不諫官
如何令國奕白首局旁觀

訃至輦三日悲來贖百身太丘里化伯起子孫貧零

落歐門士消磨濮議人殷勤齋掬淚一灑素車塵

無題

主聖如天忍棄遺臣愚何地著孤危白虹貫日殆虛語
中野履霜無怨辭寶玦已隨屍血浸鐵鞭未必鬼臂知
莫年一寸丹心在却怪湘纍有許悲

十一月二日至紫極宮誦李白詩及坡谷和篇
因念蘇李聽竹時各年四十九余今五十九矣
遂次其韻

翰林兩仙人偶來聽風竹蕭蕭玉千竿采采綠一掬少
時負不羣中歲乃見獨嗟余長十年所至戀三宿徑當
還笏歸奚俟揲著卜夜郎與儋耳老大費往復宜州殿
其後路險車又覆山中採芝去舍下炊粱熟

荅王侍郎和紫極宮詩

侍郎如蒼官歲寒友梅竹步行以當車瓢飲不如掬
人存者少靈光歸然獨朝野推意新州間敬齒宿嗟余
詩學淺未敢窺衛卜衛宏卜商朱絃纔一倡白圭費三復共

談端平事前局尚堪覆願言介眉壽江鄉秫田熟

荅廬陵彭士先

昔牧昌黎州嘗負君詩債今使番君國又辱君訪逮稍
訝顏髮非因感歲月邁君氣不墮歸君詩有光怪乍觀
祛目青徐聽驚耳瞶奈何行推敲不使坐麀載茫茫彭
蠡津衆水之所匯投竿鼇堪釣拔劍鯨可膾茲事要力
量斯文極變態吾方困鉅筭君亦挑布袋人生并合難
况復各老大

題弋陽方友民所藏紫巖西山二帖

摩娑妙墨憶微言故篋纔餘二帖存往昔翁為紫巖客
後來子及浦城門晚生多說叅諸老它日誰堪見九原
自嘆西河索居者暮年歸夢遶田園

題方友民詩卷

刪定實惟曾大父文忠況是老先生力行所學斯無愧
偶發於詩亦有聲合止笙鏞成雅奏抉挑草木示微情
嗟余公事君歸興不得相從細講明

荅陳楸伯二首

乃翁良玉不勞攻之子天葩特地紅
海道扁舟明日具江東尊酒幾時同
上樓誰伴老元德驚座今逢小孟公
回首暮雲千里合有書何處託征鴻

聖處分明世鮮知古人豈是異肝脾
謂鰲可釣無傳法視虱如輪有悟時
老子夢中還說夢郎君詩外試求詩
向來枉立埋腰雪妙在心通不在師

送王允恭隱君

一葉撐來江浪闊，兼金却去客囊空。都將歲月供丹竈，
不要功名上景鐘。古有禮羅招處士，今無書幣起逋翁。
南陽祇在荊州北，時一登高弔卧龍。

送方時父

向來羞作繞枝飛，劉表區區不足依。索飯兒嗔郎罷出，
畫眉人約藁砧歸。食魚底處容長缺，射虎今方尚短衣。
老縛一官行未到，羨君去采故山薇。

題宋謙父四時佳致樓

有序

吟者多矣率為環翠卒章下註脚惟張公元德兼
取別詩佳興與人同之句以互相發明余不識張
公端平初同召審張辭不至余所愧也故拙詩本
張遺意

四序推移景迭新二詩體認理尤清愛蓮亦既見君子
看竹不須通主人領畧春風來廣座分張月色過比鄰
端能著我西家否客戶何妨贅一民

題宋謙父詩卷

佳山祠畔結茅茨猶記吹埙更和簾蘇氏舊稱小坡賦
秦家晚重少章詩交游一老今華髮疇昔諸昆盡白眉
予不可來吾欲去壁間塵榻拂何時

寄楊休文高士

未荅前書每有慙忽收近訊自開緘繳回玉筍山人號
換得金門羽客銜石鼎聯詩塵滿硯竹宮應制草盈函
可憐予與君俱錯投老方思卸戲衫

題倪上人詩卷

故交歲晚各西東邂逅斯人慰老窮莫把冠巾浣澄觀
更添鬚髮惱林公強牽謝客為禪客閒伴涪翁作釣翁
行矣余方有公事異時倘肯訪山中

題羅亨祖叢菊隱居

令君抱甕當秋晚手種寒葩占斷清伯始厚顏貪飲水
靈均滿腹餐英要須晚節分香臭寧與朝華角悴榮
父老方夸琴調古未應高興慕淵明

題餘干姚三錫書鈔

頃傳湯序心傾挹茲得姚鈔手闔開朱子所疑非孔傳
漢儒之罪甚秦灰時清縱未經筵召歲晚寧無掌故來
攬轡遠臣慚力薄不能為國論遺材

挽李秀巖二首

耆舊凋零尚秀巖可堪華表揭新銜甘泉頌就拋荷索
寶苑方收入枕函宿昔山人來少室暮年太史滯周南
嗟余去速公歸晚不得埋腰立雪參

獲麟以後更休論化鶴而歸亦浪言過眼忽看遺老傳

終身不及長公門山房惜未從公擇書局間曾擬道源

今丞相游公嘗言秀巖欲以史局見辟

六合茫茫千載遠些成無路可招

魂

追用南塘韻題尹剛中潛齋

幽士慕鱗潛通人笑蚓蕪
誑腸壘味美節腹筍生添諸
老徒推轂先生且下簾食惟
陳簋二餽不費金兼和靖
招延晚方齋仕進恬緒言傳
粹密古調掃穠纖紫氣來
傍境靈氛告吉占因思眠雨
艇得似曝晴簷無已游坡

谷徂徠客弼淹芻言輕一羽未必動巖瞻

追和南塘韻呈湯伯紀尹子潛

誅南浦了誅餘杭各掩新丘若斧堂不見天球在東序
競吹宮笛奏西涼後生誰附青雲傳故吏惟餘白首郎
浩嘆縹縹雙鳳遠老身如雁漫隨陽

題蔡娃主簿詩卷

詩作平生祟因而廢不為君豪頻挑戰吾老怯交綏哨
騎來無定綱船發尚遲日長無職事半是撚髭時

又七言

舊止四人為律體今通天下話頭行誰編宗派應添譜
要續傳燈不記名放子一頭嗟我老避君三舍與之平
由來作者皆攻苦莫信人言七步成

題汪道士雲菴

觸石纔膚寸垂天忽怒飛道人不出戶笑汝出還歸

次韻湯伯紀送別二首

尚在朝廷記憶中敢於君命擇西東獨憐家有百歲母

可使人嗤六十翁
芟製子能華歲晏
萸羹吾亦感秋風
書成藏向深山裏
莫費君王遣所忠

比似莆杭傾蓋時
更崇古雅黜新奇
久栖衡泌寧非樂
不倚門牆未易麾
析理自應重講席
論文吾合豎降旗
撫絃欲奏成三嘆
何處而今有子期

餞送高大著出鎮嚴陵

抗疏鳴陽易翻身
出畫難無家歸蜀道
有勅管嚴灘席
藁臣言慙分茅聖
度寬空令同館士
極目認帆竿

進經筵講禮記徹章詩

惟王建邦國以禮定乾坤大分嚴堂陞彌文及冠昏徐
行非曰遜亟拜不為煩臣豈容私量人誰越短垣秦惟
捐則覆魯以秉而存制備周京奠儀成漢帝尊民彝何
可泯經籍未嘗燔明主親臨決諸儒共講論裨謔求
野戴聖自專門伋學方垂範聘書益塞源四篇殊建武
百問陋開元會粹新編鉅芟夷聚訟繁俚詞羞狗曲小
辨戒猩言舞蹈威顏近傳宣詔語溫昭回洒義畫燕衍

洽堯樽寶帶頒藏府名駒出大宛揀持叨象版烹啜試
龍團羈賤均螻蟻清華綴鷺鵷謏聞慚倚席朽質謬乘
軒佔畢無嘉頌將何報上恩

恭和御製禮記徹章詩

并奏章

臣某恭惟皇帝陛下蹈堯稽古法禹惜陰臨政已
二紀於茲典學靡一朝而輟屬者禮經徹卷講席
第勞錫御府之珍藏張鈞天之廣讌被以昭回之
飾洋乎雅正之音其在宮庭已踐成湯制心之訓

及彤翰墨不忘孔氏克己之言皆上聖知行之所
充非諸儒誦說之能贊臣猥從遠服甫侍細旃夫
何螻蟻之微忽覩龍鸞之妙非但詫殊榮於流輩
又將傳至寶於子孫仰止明良方賡喜哉之作退
惟狂簡輒裁斐然之章謹昧死仰和聖製一首陳
謝以聞臣無任瞻天仰聖激切屏營之至

臨決遺經自聖衷固殊野外與淹中五三典禮勤稽古
十六星霜久積功倚席居然慙寡淺登牀安敢紊卑崇

防民不在文為末端繫宮庭實踐充

丁未春五首

端平淳祐兩匆匆過眼光陰掣電同六十一翁無出理
孤山長寄夢魂中

生死榮枯一付天誰能裸露自求全殷勤寄語袁司隸
濫及無鬚或可憐

道是生薑樹上生不應一世也隨聲暮年受用堯夫語
莫與張程幾個爭

屢批龍鱗眷未衰孤臣萬死負恩私玉階方寸從容語
惟有天知與上知

朝領諸儒上木天夕同野老話茅椽何須支枕思殘夢
宮錦漁簑總偶然

和鍾子鴻二首

匹雛欲拔佞山難還救區區慕守官捋虎自憐餘勇在
狎鷗似責昔盟寒新麻斷腕毋容草墮甌迴頭不更看
老子平生差耐事肯於得喪置悲懽

清吟頗覺續貂難
銜袖勤於贊熱官
怪予車輪行地遠
愧予門戶似冰寒
春梁禮數呼兒具
覆醬文章怕客看
老去商歌聲滿屋
孰云野處寂無懽

題端溪王使君詩卷

社友凋零雅道窮
使君於此信英雄
性情所發前無古
騷選雖高不必同
蚤日甫曾懷渭北
暮年某只在家東
何時偃伯興文治
盡採新吟獻法宮

疊前韻謝元邃

愈叩新新愈不窮小儒氣索敢爭雄安知太白心腸異
但見曹公口鼻同顧我牢愁來澤畔放君獨步向江東
南朝人云江東無我卿當獨步他時應制金鑾殿定有蛾眉妬入宮

三疊

文字無窮才有窮可能纖艷敵渾雄早知大將壇場峻

晚作鄰翁保社同臣向讎書曾殿北本傳石渠在未央殿北君公

避世且牆東

後漢避世牆東王君公

男兒遇合由時命豈必詩名

滿六宮

挽陳惠倅

昔預八仙飲深知七子才云何埋玉樹不復倒金罍錦
製曾三試羅浮欠一來吾衰慚誅筆搔首寄餘哀

挽姚循州

直夫元
泰之弟

太息龍川守專城美績傳方聞歌叔度俄有謗文淵舊
府黃茅外新丘紫帽邊二姚俱已矣懷昔一悽然

荔支盛熟四絕

繡行鄉國詫兒童錦裏宮城擅長雄看取後村真富貴

屋山丹繪半天中

曾攀玉李青冥上亦摘蟠桃縹緲邊定是三生有靈骨
謫歸猶作荔支仙

牡丹姚魏荔方陳歐蔡亡來罕識真縱使有文堪續譜
未知楷法屬何人

吳兒一夏甌生塵染藕炊菱不療貧安得風檣馳萬樹
屬饜菜色覓腸人

石塘感舊十絕

浮空紫氣何須爾度世金丹豈有之
函谷不煩關尹出城南莫遣樹精知

鹿門陳迹有餘哀獨記龐公返自崖
行到當時相送處

不知老淚自何來

余往來甥館外舅未嘗相送
惟戊子悼亡而歸送至延慶

沈郎院閉綵雲收寂寞秋花折樹頭
留取斷絃來世續此生長抱百年愁

比丘會泣別瞿曇秦失三號弔老聃
自笑此翁非鐵漢白頭來此哭同參

鬢邊雪映眼中花更閱人間幾歲華
丁未老人開七秩尚攜雞絮到君家

光霽丰標今寂滅靈明根性詎消磨
夜來一段佳風月不見堯夫只見窩

三塋相望一牛鳴來掃新松百感生
季札旋封孔哭墓晉人謬謂聖忘情

禪學年來亦自衰大叢林屬小閣
黎寒翁菴子如蝸殼却有彌天釋住持

中軍晚歲甥辭去左相今朝客不來看取少林誠長老
死生林下伴寒齋

久作遼天獨鶴飛鏡驚餘念尚依依荒山野水蘇溪路
愁絕鰥翁挈影歸

九日登辟支巖過丁元暉給事墓及仲弟新阡
二首

絕巔萬籟盡沉沉重倚闌干感慨生古佛龕中苔上面
故交宰上樹成陰山無白額妨幽討野有黃花且滿斟

莫怪徘徊侵暮色老人能得幾登臨

歷歷向時遊覽處重來年已迫桑榆大衾尚欲同林下
華表安知忽路隅自古增悲摘瓜蔓即今不共插茱萸
人生患不高年爾到得年高萬感俱

題林璞經屬平寇錄

儵爾蜂窩起俄然鼠首梟果能歌競病不枉事嫖姚瘴
嶺收氛侵朝家賞爛焦祝君深養勇稍北有天驕

季父習靜哀詩四首

闕洛源流遠乾淳輩行尊一檠常對卷貳簋亦開樽
編素幾空巷玄纁不及門異時遺逸傳誰定訪丘園

憶在嬰兒日常依少父傍不嗔仲容小猶記阿宜長
誨語祛蒙吝俚辭愧惰荒從今有疑義無復叩山房

習靜先生子劉子新阡即此是標題便無華表翔雙鶴
不有生芻藉隻雞在昔陶潛書處士從他孟德揭征西
原頭一慟闕倫紀始信彭殤未易齊

易學紛紛各著書獨於師說著工夫涪翁舊傳七分止

邵子先天一畫無不遺耆英陪講讀空留章句授生徒
即今黃策方施用姑可藏山待後儒

工部弟哀詩二首

忽然吹散恨難平六十年間老弟兄春草池塘成昨夢
夜牀風雨付來生歸謀甫里田差晚去與端溪石共行
部曲出門情態異不如籠鶴有哀聲

去歲書來欲解麾數行遺墨半傾欹斑衣不遂娛親志
白髮因吟哭子詩讓棗猶如前日事摘瓜空抱暮年悲

情知衰泪無堪滴原上寒茄苦死吹

挽方德潤寶學三首

龔勝乘車晚陽城伏閣初自云臣語戇不是上恩疎黃壤全名節青編載諫書始知年與德造物有乘除

憶被烏臺劾聃非傳偶同瞽言拚萬死明詔赦孤忠全活皆英主淹留各秃翁傷心古遺直不返瘴雲中

晚賜延和對言公去國深遂良垂白髮臣甫抱丹心馳驛無銀信遺麾有玉音遙知遺奏上未免動宸襟

挽方孺人一首

寶學之女

壺範經親授，笄年咏好逑。謂迎荷索返，豈料薨華休。斷雁元方恨，離鸞小宋愁。鄰翁憊無力，不及送原頭。

陪諸先輩題名登春臺臞軒即席次故相陳魏

公韻某繼作

臺荒屋老閱人深，拂拭留題重整襟。科目一朝來券外，姓名三世在碑陰。公孫晚歲叨明詔，表氏當年費苦吟。報與曲江先輩道，老婆非復少時心。

遨頭唱首各高深才薄難披作賦襟已覺鶯花成一夢
尚貪螢雪競分陰即今空負臺萊意宿昔曾賡殿閣吟
北望鈞天搔白首區區終有祝堯心

答循倅潛起


別後書稀夢亦稀忽傳尺素到柴扉不知天驥方徐步
將謂雲鵬久怒飛句律斬新過似舊姓名略是復疑非
長官仙去賓朋散存者依稀杜微

亡友鄭君瑞為閩
清宰君為主簿余

始識君
於縣齋

過季父新阡

父兄俱映漢藜青，獨老空山聚凍螢。
生不肯扶靈壽杖，死堪上應少微星。
向來枕膝傳師學，末後懸棺合禮經。
惟有書房舊時月，夜深得得照疎櫺。



後村集卷十六

欽定四庫全書

集部

後村集卷十七

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣陳秉寧

欽定四庫全書

後村集卷十七

宋 劉克莊 撰

詩話上

故事經筵徹章宸翰賜講讀官詩率取前人絕句淳祐
丙午講禮記畢錫宴秘書省御製七言唐律一首云鰲
極開先已降衷上天下澤禮居中三才義理維持力萬
世綱常建立功孔聖法言多纂輯漢儒師學共修崇經
帷講徹資羣彥克已工夫在擴充詩既雄渾而奎文綯

爛行草適麗各為一體侍讀少師鄭公以下拜賜者十有四人克莊與焉徹章賜御製詩自今上始

施眾滅滅鱸鮪發發葭揭揭庶姜孽孽庶士有揭鄭氏曰庶姜謂姪弟董氏曰庶士謂媵臣毛氏曰孽孽盛飾余始悟屈原九章云魚鱗鱗兮媵予之意本此

詩四言尤難以三百五篇在前故也韋氏云誰謂華高企其齊而誰謂德難厲其庶而使經聖筆亦不能刪也曹公短歌行末云山不厭高海不厭深周公吐哺天下

歸心且孔融楊修俱斃其手操之高深安在身為漢相而時人目以漢賊乃以周公自擬謬矣

魏文帝善哉行云人生如寄多憂何為今我不樂歲月如馳當操無恙植以才倉舒以慧幾至奪嫡謂之多憂可也及受漢禪足快其所大欲矣帝既猜阻鮮懼而諸侯王就封者皆為典籤所迫多見削奪其末命乃託國於狼顧之仲達是帝之憂至死未已何時而可樂乎曹植以蓋代之才他人猶愛之況於父乎使其少加智

巧奪嫡猶反手爾植素無此念深自斂退雖丁儀等坐誅辭不連植黃初之世數有貶削方且作詩責躬上表求自試兄不見察而不敢廢恭順之義卒以此自全可謂仁且智矣文中子曰至哉思王以天下讓真篤論也贈白馬王彪云丈夫志四海萬里猶比鄰恩愛苟不虧在遠分日親何必同衾幃然後展殷勤憂思成疾疢母乃兒女仁倉卒骨肉情能不懷苦辛末云離別永無會執手將何時王其愛玉體俱享黃髮期於時諸王凜凜

不自保子建此詩憂傷慷慨有不可勝言之悲詩中所謂蒼蠅間白黑讒巧令親疎蓋為灌均輩發終無一毫怨兄之意處人倫之變者當以為法

彰以驍勇斃植以文義全蓋丕所忌非文人也使倉舒在却未必可存倉舒亡操謂丕輩曰我之不幸汝輩之幸也此語失父道矣豈所以愛倉舒哉陸機弔魏武文云曩以天下自負今以愛子託人其言甚可悲也

嵇康幽憤詩云性不忤物頻致怨憎按康傲鍾會不與

語與山濤書自言薄周孔而非湯武其所忤也大矣子
元子上見書自無可全之理況加以士季乎雖欲采薇
散髮順性養壽豈可得也

四言自曹氏父子王仲宣陸士衡後惟陶公最高停雲
榮木等篇殆突過建安矣

五言見於書詩如元首叢脞哉胡為乎泥中之類非始
於蘇李也武別陵云欲展清商曲念子不能歸又云願
為雙黃鵠送子俱遠飛陵雖萬無還理武尚欲拔之以

歸漢忠厚之至也

康樂稱太傅為宗衮子建稱孟德為家王皆自我作古
嵇康以非湯武三字殺身如韓亡子房奮秦帝魯連恥
之句謂之反形已具可也康樂安得全乎然康樂若以
改物為恥竊負而逃可也為淵明亦可也既仕宋乃欲
為子房魯連於誼未有所安悲夫

阮嗣宗云寧與燕雀翔不隨黃鵠飛黃鵠游四海中路
將安歸蓋嘆時人之安於卑近而自傷其才大志廣無

所稅駕非謂士之抗志甘為燕雀而已嵇阮齊名然勸進表叔夜決不肯作

文章正宗初萌芽西山先生以詩歌一門屬予編類且約以世教民彝為主如仙釋閨情宮怨之類皆勿取予取漢武帝秋風辭西山曰文中子亦以此辭為悔心之萌豈其然乎意不欲收其嚴如此然所謂攜佳人兮不能忘之語蓋指公卿羣臣之扈從者似非為後宮設凡予所取而西山去之者大半又增入陶詩甚多如三謝

之類多不入

詩至三謝如玉人之攻玉錦工之機錦極天下之工巧
組麗而去建安黃初遠矣

陶公如天地間之有醴泉慶雲是惟無出出則為祥瑞
且饒坡公一人和陶可也

潘岳云春榮誰不慕歲寒良獨希若能却顧長慮者然
身遊金谷以賈謚石崇為託歲寒之地悲夫

謝康樂有擬鄴中詩八首江文通有擬雜體三十首名

曰擬古往往奪真亦猶退之琴操真可以絃廟瑟子厚天對真可以答天問今人號為摹擬某作求其近似者少矣

贈盧諶詩前歷序伯王之佐下云中夜撫枕嘆思與數子遊又云功業未及建夕陽忽西流時哉不我與去乎若雲浮昔蒯通讀樂毅之書而泣余於越石此詩亦然前作有甚拙者劉越石云宣尼悲獲麟西狩涕孔邱兩句一事也阮嗣宗云多言焉所告煩辭將訴誰兩句一

意也然不以瑕掩瑜

宋少帝前溪曲云黃葛生爛漫誰能斷葛根寧斷嬌兒乳不斷郎殷勤其才思乃在陳後主隋煬帝之上

魏文帝有見輓船士新婚別妻詩一首庶幾熠燿宵行蠨蛸在戶之遺意呂東萊馬嵬詩云錦襪千年恨皇輿萬里程寧知輓船士亦有別離情輓船事與馬嵬不相涉而善用之如此

焦仲卿妻詩六朝人所作也木蘭詩唐人所作也樂府

惟此二篇作敘事體有始有卒雖辭多質俚然有古意
徐陵所叙玉臺新咏十卷皆文選所棄餘也六朝人少
全集雖賴此書略見一二然賞好不出月露氣骨不脫
脂粉雅人莊士見之廢卷昔坡公笑蕭統之陋以陵觀
之愈陋於統如沈休文六憶之類其褻慢有甚於香奩
花間者然則自國風楚詞而後故當繼以選詩不易之
論也

唐初王楊沈宋擅名然不脫齊梁之體獨陳拾遺首倡

高雅冲淡之音一掃六代之纖弱趨於黃初建安矣太
白韋柳繼出皆自子昂發之如世人拘目見酣酒笑丹
經崑崙有瑤樹安得采其英如林居病時久水木淡孤
清閒卧觀物化悠悠念羣生青春始萌達朱火已滿盈
但落方自此感嘆何時平如務光讓天下商賈競刀錐
已矣行采芝萬世同一時如吾愛鬼谷子青谿無垢氛
囊括經世道遺身在白雲舒可彌宇宙卷之不盈分豈
徒山水壽空與麋鹿羣如臨岐泣世道天命良悠悠昔

日殷王子玉馬遂朝周寶鼎淪伊穀瑤臺成古丘西山
傷遺老東陵有故侯蟬蛻翰墨畦逕讀之使人有眼空
四海神遊八極之興

杜審言夜宴云酒中堪累月身外即浮雲登襄陽城云
楚山橫地出漢水接天迴妾薄命云啼鳥驚殘夢飛花
攪獨愁杜氏句法有自來矣

杜五言感時傷事如親朋無一字老病有孤舟如敢料
安危體猶多老大臣如不愁巴道路恐濕漢旌旗其用

事琢對如須為下殿走不可好樓居如竟無宣室召徒
有茂陵求如魯衛彌尊重徐陳畧喪亡八句之中著此
一聯安得不獨步千古若全集千四百篇無此等句為
氣骨篇篇都做圓荷浮小葉細麥落輕花道了則似近
人詩矣

古人感知已之遇季布奏事彭越頭下臧洪盧諶皆不
以主公成敗而二其心叔季所謂賓客方翕翕熱時則
趨附恐後及時異事改則振臂而去至有射羿者世傳

嚴武欲殺子美殆未必然觀老親如宿昔部曲異平生之句極其悽愴至位置武於八哀詩中忠厚藹然異於幕府少年今白髮之作矣李義山過舊府寄諸掾詩云莫憑無鬼論終負託孤心猶有門生故吏之情可以矯薄俗

唐人善形容人情物態杜公云已經十日竄荆棘困阨極矣然腰下寶玦青珊瑚終不解去何也義山云不收金彈拋林外却憶銀牀在井頭亦曲盡貴公子之慙態

若貫休輩自拳五色毬
進入他人宅却捉蒼頭奴
玉鞭打一百之句拙俚甚矣

太白古風云大雅久不作
吾衰竟誰陳王風委蔓草
戰國多荆榛龍虎相啖食
兵戈逮狂秦正聲何微茫
哀怨起騷人揚馬激頽波
開流蕩無垠廢興雖萬變
憲章亦已淪此今古詩人
斷案也黃河走東溟白日
落西海逝川與流光飄忽
不相待春容捨我去秋髮
已衰改人生非寒松年貌
豈常在吾當乘雲螭吸景
駐光彩西上蓮

花山迢迢見明星素手把芙蓉虛步躡太清此六十八
首與陳拾遺感遇之作筆力相上下有唐諸人皆在下
風

古人服善太白過黃鶴樓有眼前有景道不得崔顥題
詩在上頭之句至金陵遂為鳳皇臺詩以擬之今觀二
詩真敵手棋也若它人必次顥韻或於詩版之傍別著
語矣

玉川子貧甚僧送米令割俸其家必無蓋藏一婢赤脚

必無姝麗所訟惡少騎屋下瞰未必盡然既為答捕惡
少不以為德反謂處置未是它人處此必怒退之乃巽
詞謝之為具招之玉川赴其約又先致雙鯉亦不之却
舊史稱退之性倔強以玉川事觀之乃一委曲人也然
其與憲宗爭佛骨與御史中丞李紳爭臺參與王庭湊
爭牛元翼與河南尹鄭相爭賣餅軍人則毅然不可奪
倔強於大節而委曲於羣碎此其所以為退之歟

李翱張籍皇甫湜皆韓門弟子翱妻又會女也故退之

皆名呼之如云李翱觀濤江又云籍湜輩然翱祭退之
文乃稱為兄師弟子姑未論兄妻之諸父可乎籍祭詩
云而後之學者或號為韓張有抗衡之意湜作墓碑云
公疾諭湜曰死能令我躬不隨世磨滅者惟子以為屬
退之乃賴湜而傳耶近世推黃配蘇亦類此

退之性喜玩侮如呂醫山人之類固可侮楊之杲侯喜
諸生也乃況之杲以柏馬又借釣魚嘲喜云舉竿引線
忽有得一寸纔分鱗與鬚盧仝張籍之齒長矣於盧則

云先生抱才終大用宰相未許終不仕形容其迂闊不
少貸於籍則云君乃崑崙渠籍乃嶺頭龍譬如蟻蛭微
詎可陵崕崈贈崔立之云朝為百賦猶鬱怒暮作千詩
轉道緊若服其敏者下句却云才豪氣猛易語言往往
蛟螭雜螻蟻則多而不精可以緊見其於詩人中惟東
野文人中惟子厚稍加敬

唐僧見於韓集者七人惟大顛穎師免嘲侮高閒草書
頗見貶抑如惠如靈如文暢如澄觀直以為戲笑之具

而已靈尤跌蕩至於醉花月而羅嬋娟此豈佳僧乎韓公方且欲冠其顛始聞澄觀能詩欲加冠巾及觀來謁見其已老則又潛然惜其無及所謂善謔而不為虐者耶

柳子厚才高它文惟韓可對壘古律詩精妙韓不及也當舉世為元和體韓猶未免諧俗而子厚獨能為一家之言豈非豪杰之士乎昔何文縝嘗語李漢老云如柳子厚詩人生豈可不學他做數百首漢老退而嘆曰得

一二首似之足矣文縝後從北狩病中詩云歷歷通前
劫依依返舊魂人生會有死遺恨滿乾坤雖意極忠憤
而語不刻急亦學柳之驗

呂溫坐佐文黨黜守道衡二州卒於衡柳子厚誄之曰
遷理於道民服休嘉賦無吏迫威不刑加又言二州之
人哭者逾月坡公謂溫小人何以得此然余觀溫集送
江華毛令絕句云布帛精粗任土宜疲人識信每先期
今朝臨別無它囑雖是蒲鞭也莫施太守送縣令之言

如此則子厚所書非溢美矣今世士大夫笑溫者比比及為二千石屬縣能督賦者蒙殊獎負殿者受嚴譴有能為溫此言未見其人也

呂溫詩云天下起兵誅董卓長沙義士最先來荆公云江東子弟多才俊卷土重來未可知皆可以倡東南勇敢之氣

王建新嫁娘詩云三日入厨下洗手作羹湯未諳姑食性先遣小姑嘗張文潛寄衣曲云別來不見身長短試

比小郎衣更長二詩當以建為勝文潛詩與晉人參軍
新婦之語俱有病

劉長卿七言云欲掃柴門迎遠客青苔紅葉滿貧家魏
野林逋不能及也

洛神賦子建寓言也好事者乃造甄后事以實之使果
有之當見誅於黃初之朝矣唐彥謙云驚鴻瞥過游龍
去虛惱陳王一事無似為子建分疏者

唐人敘述奇遇如后土夫人事託之韋郎無雙事託之

仙客鶯鶯事雖元稹自叙猶借張生為名惟沈下賢秦夢記牛僧孺周秦行記李羣玉黃陵廟詩皆攬歸其身名檢掃地矣

古樂府云新婦初來時小姑始扶牀今日被驅遣小姑如我長迴頭語小姑勿嫁似兄夫庶幾哀而不怨矣

雍陶送春詩云今日已從愁裏去明年莫更共愁來稼軒詞云是他春帶愁來春歸何處却不解和愁將去雖用前語而反勝之

唐失河湟未久司空圖詩云漢人盡作邊人語却向城頭罵漢人燕山自石晉割棄至本朝宣和歷年多矣議者猶以燕人思漢藉口卒召禍亂

劉言史贈成鍊師云大羅過却三千歲更向人間魅阮郎此女道士豈魚玄機之流歟唐人多不矜細行李羣玉有龍門寺佳人阿最歌云何須同泰寺然後始為奴其放潑如此夫陶寫情性如閒情賦可也過則為羣玉矣

唐人多傳盧仝因留宿王涯第中遂預甘露之禍仝老
無髮奄人於腦後加釘焉以為添丁之識或言好事者
為之仝處士與人無怨何為有此謗然平時切齒元和
逆黨月蝕一詩膾炙人口意者羣奄因此害之太平廣
記載孝廉許生遇四丈夫與白衣叟會飲於甘棠館西
噴玉泉四人謂叟曰王川來何遲叟舉壁間所見詩座
中聞之皆擁面欲慟已而叟與四人者各賦一篇蓋王
涯賈餗舒元興李訓與仝之鬼也按甘露之謀涯餗不

預元興訓雖狂疎敗事其志與陳蕃竇武宋申錫何異
得罪於羣奄則有之於社稷無負也身與其宗既菹醢
於寺人之手終唐之世名與叛逆同科僅嘗收葬羣奄
又使人發之投骨渭水子孫或逃依劉從諫苟活旦暮
甚可憐矣及澤潞平被害無焦類詔書猶謂之逆賊之
後此何理也李文饒實當國政刑如此豈畏奄人耶抑
有宿憾於涯輩耶至昭宗危亂中始有雪涯等之詔噴
玉泉詩云李固有寃藏蠹簡鄧攸無子續清風又云雖

有衣衾藏李固終無表疏雪王章皆可傳誦白衣叟所
舉壁間詩云六合茫茫皆漢土此身無處哭田橫妙甚
此必是涯元輿門生故吏所作

杜牧之聞慶州趙縱使君與党項戰死詩云將軍獨乘
鐵驄馬榆溪戰中金僕姑死綏却是古來有驍將自驚
今日無青史文章爭點筆朱門歌舞笑捐軀誰知我亦
輕生者不得君王丈二父皇祐中儂賊犯康州合郡潰
去惟守臣曹覲死之妻方產子棄之草間亂後訪之尚

呱呱然諸公哀誅惟元厚之云轉戰譙門日欲晡空拳
猶自把戈鋌身垂虎口方安坐命在鴻毛更疾呼柱下
杲卿存斷節袴中杵白得遺孤空餘三尺英雄氣不愧
山西士大夫欲與牧詩並驅

樊川集中有李給事詩云元禮去歸緱氏學江充來見
犬臺宮又云可憐劉校尉曾訟石中書李名中敏嘗論
鄭注免歸又忤仇軍容棄官二聯可謂善用事矣

劉夢得五言如蜀先主廟云天下英雄氣千秋尚凜然

勢分三足鼎業復五銖錢得相能開國生兒不象賢悽涼蜀故妓歌舞魏宮前八陣圖云軒皇傳上略蜀相運神機水落龍蛇出沙平鷺鶴飛波濤無動勢鱗介避餘威會有知兵者臨岐指是非中秋云星辰讓光彩風露發晶英能變人間世儵然是玉京七言如洛中寺北樓云高樓賀監昔曾登壁上筆踪龍虎騰中國書流讓王象北朝文士重徐陵偶因獨見空驚目恨不同時便服膺惟恐塵埃轉磨滅再三珍重囑山僧西塞山懷古云

西晉樓船下並州金陵王氣黯然收千尋鐵鎖沉江底
一片降幡出石頭人世幾回傷往事山形依舊枕寒流今
逢四海為家日故壘蕭蕭蘆荻秋哭呂溫云遺草一函
歸太史旅墳三尺近要離金陵懷古云山圖故國周遭
在潮打空城寂寞回皆雄渾老蒼沈著痛快小家數不能
及絕句尤工

夢得貞元間已為郎官御史牛相方在場屋投贄文卷
夢得飛筆塗竄牛既貴未能忘有曾把文章謁後塵之

句夢得荅云初見相如成賦日後為丞相掃門人且飭諸子以已為戒然和令狐相云鮮有一身兼將相更能四面占文章則依然故態此詩幸次楚韻若施之於絢豈止掇兔羹燕麥之怒耶同時八司馬皆高才一斤不復或咎時宰無樂育意惟新史謂貪帝病昏抑太子之明深當其罪後裴度為夢得免播州之行憲宗怒尚未解非但諸公忌才也

夢得歷德順憲穆敬文武七朝其詩尤多感慨惟在人

雖晚達於樹比冬青之句差閒婉荅樂天云莫道桑榆
晚微霞尚滿天亦足見其精華老而不竭

莫徭自生長名字無符籍市易雜鮫人婚姻通木客星
居占泉眼火種開山脊夜渡千仞溪含沙不能射蠻語
鈎輈音蠻衣斑斕布熏狸掘沙鼠時節祀盤瓠忽逢乘
馬客恍若驚麕顧腰斧上高山意行無舊路此劉夢得
莫徭蠻子詩也世傳坡詩始學夢得觀此二詩信然

元稹咏估客云爾又生兩子錢刀何歲平薛郁和番詩

云君王莫信和親策到得生男患更多

往年黑風峒詐降朝廷以通直郎鎮南僉幕招之不出
使其弟來吉州謁帥帥以角妓奉之豐宅之云遺下種
類奈何

唐彥謙寒食五言云微微潑火雨草草踏青人本朝王
元之詩亦用潑火雨

牧之譽阿宜義山譽袁師後二兒皆無聞退之不譽子
姪直言阿買不識字

李義山荅令狐補闕云人生有通塞公等繫安危於升
沉得喪之際婉而成章簡齋南渡初被召東同時召客
云共談太極非無意能繫蒼生本不同則氣象益開濶
矣

唐任藩詩存者五言十首而已然多佳句衆鳥已歸樹
旅人猶過山贈僧云半頂髮根白一生心地清居然可
愛令人動為千百首而無可傳者

薛能詩格不甚高而自稱譽太過五言云空餘氣長在

天子用平人不但自譽其詩又自譽其才然位歷節鎮
不為不用矣卒以驕恣陵忽僨軍殺身其才安在妄庸
如此乃敢妄議諸葛可謂小人無忌憚矣

揚州在唐時最繁盛故張祐云人生只合揚州死蜀都
在本朝最繁盛故放翁云不死揚州死劔南

杜牧許渾同時然各為體牧於唐律中常寓少拘峭以
矯時弊渾則不然如荆樹有花兄弟樂橘林無實子孫
忙之類律切麗密或過牧而抑揚頓挫不及也二人詩

不著姓名亦可辨樊川有續別集三卷十之八九皆渾
詩收佳句自多不必又取他人詩益之若丁卯集割去
許多杰作則渾詩無一篇可傳矣牧仕宦不至南海別
集乃存南海府罷之作甚可笑

韋蘇州話舊云昔事武皇帝無賴恃恩私身為里中橫
家藏亡命兒朝攜擣蒲局暮竊鄰家姬司隸不敢捕立
在白玉墀此蓋韋公身在三衛目擊其類如此非自謂
也王建羽林行亦云長安惡少出名字樓下却商樓上

醉天明下直明光宮散入五陵松柏中百回殺人身合
死赦書猶有收城功九衢一日消息定鄉吏籍中重改
姓出來仍舊屬羽林立在殿前射飛禽可與韋詩互看
韋詩律深妙流出肝肺非學力所至世言其掃地焚香
而坐不應為人老少頓異可見前詩寓言爾

予美送孔巢父云若逢李白騎鯨魚道甫問訊今何如
蓋李杜與巢父一輩人也又云詩卷長留天地間釣竿
欲拂珊瑚樹則巢父亦能詩者偶失傳爾予美間關亂

離挺節無所污巢父後沒王事惟太白坐永王璘事流
夜郎按璘嘗辟巢父而巢父不應可見太白當去就欠
商量也新史謂白佐璘起兵頗似文致但不當就其辟
爾

李遠贈寫御容李長史云初分隆準山河秀再點重瞳
日月明極工及坡公仰觀眩晃目生暈但見曉色開扶
桑迎陽晚出步就座絳紗玉斧光照廊野人不識日月
角髣髴尚記重瞳光之篇一出光焰萬丈視遠所作真

小兒語

歐陽率更貌寢陋長孫無忌嘲之云誰令麟閣上畫此一獼猴好事者遂造白猿之說謗及其親

鄭畋名相父亞亦名卿或為李娃傳誣亞為元和畋為元和之子小說因謂畋與盧攜並相不咸攜詬畋身出倡妓按畋與攜皆李翱甥畋母攜姨母也安得如娃傳及小說所云唐人挾私忿騰虛謗良可發千載一笑亞為李德裕客白敏中素怨德裕及亞父子娃傳必白氏

子弟為之託名行簡又嫁言天寶間事且傳作於德宗之貞元追述前事可也亞登第於憲宗之元和畋相於僖宗之乾符豈得預載未然之事乎其謬妄如此如周秦行記世以為德裕客韋絢所作二黨真可畏哉

張籍還珠吟為世所稱然古樂府有羽林郎一篇後漢辛延年所作云昔有霍家奴姓馮名子都依倚將軍勢調笑酒家胡胡姬年十五春日獨當壚長裙連理帶廣袖合歡襦頭上藍田玉耳後大秦珠兩鬟何窈窕一世

良所無不意金吾子娉婷過我廬銀鞍何煜爚翠蓋空
踟躕貽我青銅鏡結我紅羅裾男兒愛後婦女子重前
夫人生有新故貴賤不相踰多謝金吾子私愛徒區區
籍詩本此然青於藍

送宮人入道唐人多有此作荆公止選項斯一首云願
從仙女董雙成王母前頭作伴行初戴玉冠多悞拜欲
辭金殿別稱名將敲碧落新齋磬却進昭陽舊賜簪旦
暮焚香繞壇上步虛猶作按歌聲未脫唐體也韋蘇州

詩家最高手亦有此作云捨寵求仙畏色衰辭天素面
立天墀金丹擬駐千年貌寶鏡休勻八字眉公主與收
珠翠後君王看戴角冠時從來宮女多相妬聞向瑤臺
總汨垂絕不類韋詩與斯輩竟何以異風俗移人如此
或是韋公戲效時人體耳

牛奇章有夜入真珠室朝遊玳瑁宮之謗張祐上牛相
亦云四十便封侯名居第一流下有綠鬟紅粉之語末
云知君年少貴不信有春愁蓋前詩非謗矣牛李嗜好

如冰炭惟愛石則如一人然贊皇生相門無聲色之好
奇章起寒士備貴人之奉不及贊皇遠矣

唐人詩與李杜同時者有岑參高適王維後李杜者有
韋柳中間有盧綸李益兩皇甫五竇最後有姚賈諸人
學者學此足矣長慶體太易不必學王逢原題樂天墓
末云若是篇章深李杜竹符還不到君分豈亦病其詩
之淺耶

王鐸盡忠唐室奮討巢賊初節與鄭畋略同大功垂就

令攷間之於內解其都統鐸詩云三塵上相逢明主九
合諸侯愧昔賢可謂慨然有志者然居亂世要須十分
清苦庶可自全孔明躬耕娶阿承醜女相蜀不殖產其
慮深矣鐸當國家板蕩之際居將相衮鉞之任乃攜妓
妾輜重慢藏冶容行於虎狼之都三百口遂併命於高
雞泊哀哉

後村集卷十七